

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 428225 22 St
Tuzla, 22.09.2022.godine

OPĆINSKI SUD U TUZLI, sudija Antonela Đaković, u postupku predhodnog ispitivanja prijedloga za otvaranje stečajnog postupka nad dužnikom „ARCADE“ d.o.o. za export-import Tuzla, ul. Dokanj do br. 22, dana 22.09.2022.godine donio je slijedeće:

R J E Š E N J E

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom dužnika „ARCADE“ d.o.o. za export-import Tuzla, ul. Dokanj do br. 22, MBS: 1-2763.

Za privremenog stečajnog upravnika imenuje se Besim Hamidović iz Zvornika, Križevici 173, 75404 Gušteri.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju FBiH (Službene novine FBiH br. 53/21), a naročito:

- obezbijediti imovinu dužnika i starati se o istoj,
- ima ovlašćenja da uđe u poslovne prostorije dužnik i provede neophodne radnje,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka
- uraditi kontrolu poslovanja stečajnog dužnika
- kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama FBiH“, web stranici Općinskog suda u Tuzli i na Internet stranici FIA-e te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Tuzli i Gradskoj službi za geodetske i imovinsko-pravne poslove Grada Tuzla, radi upisa zabilježbe otvaranja prethodnog postupka.

O b r a z l o ž e n j e

Predlagač „ARCADE“ d.o.o. Tuzla, putem zakonskog zastupnika, podnio je dana 15.07.2021.godine ovom sudu prijedlog za otvaranje stečajnog postupka nad navedenim privrednim subjektom, zbog platežne nesposobnosti dužnika koji nije u stanju izvršavati svoje dospjele i potraživane obaveze plaćanja u dužem vremenskom periodu.

Stečajni sudija je nakon što je utvrdio da je prijedlog za pokretanje stečajnog postupka podnesen od strane ovlaštenog predlagača i da je isti dopušten u smislu odredbe člana 58. stav 2. i 13. Zakona o stečaju postupku, dana 12.09.2022. godine rješenjem naložio predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka. Predlagač je dana 19.09.2022.godine dostavio sudu dokaz o uplati predujmljenih sredstava za finansiranje prethodnog postupka u iznosu od 3.000,00 KM.

Na osnovu priložene dokumentacije i to: Odluka o prestanku rada društva i pokretanju stečajnog postupka od 15.07.2022.g.; Aktuelni izvod iz sudskog registra od 05.08.2022.g.; Izvještaj Centralne banke BiH o računima poslovnog subjekta na dan 02.08.2022.g.; Prijedlog za dozvolu izvršenja sa priložima, Bilans uspjeha za period od 01.01. do 31.12.2021.g.; Bilans stanja na dan 31.12.2021.g.; Uvjerenje UIO BiH, RC Tuzla od 18.05.2022.g.; Uvjerenje KPU Tuzla, PI Tuzla od 20.05.2022.g.; Dopis Općinskog suda u Tuzli upućen Procredit banci d.d. od 29.04.2022.g., predlagač je učinio vjerovatnim platežnu nesposobnost dužnika. Na ročištu za saslušanje stečajnog dužnika održanog dana 12.09.2022.godine, zakonski zastupnik predlagača je izjavila da u cijelosti ostaje kod prijedloga za otvaranje stečajnog postupka nad imovinom društva, a kao razlog ističe platežnu nesposobnost i nemogućnost izvršavanja dospjelih i potraživanih obaveza plaćanja u dužem vremenskom periodu, te je društvo prestalo sa radom krajem 2019.godine. Društvo nema imovine kako pokretne tako i nepokretne, nema zaposlenika, a ima više aktivnih sudskih sporova od kojih se većina vodi pred Općinskim sudom u Tuzli. Račun društva otvoren kod Procredit banke d.d Sarajevo je blokiran. Društvo nema dospjelih, a neizmirenih obaveza po osnovu indirektnih poreza, kao ni duga prema Poreznoj upravi po osnovu javnih prihoda.

Imajući u vidu podnesenu dokumentaciju i izjavu zakonskog zastupnika dužnika, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju („Sl. novine F BiH“, br.53/2021.). Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

SUDIJA

Antonela Đaković

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, računajući od dana objavljivanja. Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu putem ovog Suda.